

賴古堂集

賴古堂集卷之二

浚水周亮工櫟園著

五言古

庚子重九前四日板屋欲雨同姚仲潛吳冠
五諸君子共拈劉隨州藜杖嬾迎征騎客
菊花能醉去官人爲韻得十四首

雨意漸欲成雲勢高未齊借書不能讀看雲獨策
藜故人忽作念一罇遠相攜入門自傾倒笑我何
悽悽有酒不肯飲日見夕陽西

草居若小舫銜艫共相向颶風四面來波濤齊蕩
漾隔離我友呼披塵自挈杖壺觴亦已陳談諧忽

復暢得酒一婆娑醉人無善狀

好友遺我札竟幅無寒暖修詞自雍雍豎義須侃侃綢繆千百言責我疎且懶殘形不可藥敝衣難再澣廻環諷良書卮酒一心滿

躊躇東籬下奕奕粲落英裊露有佳色澹與秋相迎云是長年藥食之替者明欣然採盈把泛此忘憂觥奇憂願且避吾忽愛吾生

迢迢千萬里我昔事遐征波濤日鏗鎔苦與蟣蝨爭強顏營一飽鄙哉食餅僧已昧禍鱗集寧知福羽輕白日沉沉下此爲世上名

千林半夜喧銜枚奔萬騎隣客驚未眠攜觴析疑

義無籍佐遐檣意解等兒戲但感載酒心頗憎問
奇字同君盡此罇不奈秋風吹

東偏種兩榆西偏菊與栢草堂不數楹層層羅書
冊昨夜兒信來已成他人宅榆栢匪我思短菊我
所惜寒花有素心爲我色不憚北風向南吹珍重
後來客

去歲吳仲子眠余因樹屋風雨此重陽日日詠黃
菊菊花能再開菊帖難重讀明明昨夜燈歲序亦
何速草木不忘情悲哉我羈獨

浮蘆三五葉約束此爲家風雨忽欲來篷外數歸
鴉鴉聲不敢噪羈心不敢譁依依曲慰人得此霜

中花

楚楚高垣列孤鴈
唳秋燈老眼披殘帙
窈然雲霧層拋書
且飲酒大酌滿三升
豐憂敵薄醴久之力
不勝酒醒鴈南去
飛飛我未能

脾病久難痊
疔羸掩清泪
隙風傷人眸
薄板何能避
昏黃壁上燈
搖搖走魑魅
恩怨亦已忘
彭殤應無二
我非莊列流
近之以大醉

碧潭映黃花花情平
以恕率性貧賤家
直心高下著遲遲
生退思每每同衆
庶清泉泛老根
坦然與客茹我夢
過其間酌之不願去

蒲心不自振
弱葉伏蒼官
蕉形不自束
攢莖來竹

彈展轉逢彼怒磬折自心酸爲生不努力悒悒泣
歲寒惟此池上菊蕭條結古歡

去畱情無恹患難易爲真草草具壺觴歡然各有
陳菊葉前月長菊花昨日新素心三五友慰我旦
夕身曠世猶相感況此同時人

庚子重九雜感用古詩十九首韻呈今醉先
生並諸同人

曰歸復曰歸萎絕輕別離波濤騰日夜浩渺無津
涯昧不聞大道安能得前知高樾有奇蔭枯樹無
華枝危途不暫遠危機不暫緩雖有魯陽戈白日
何由返老鐵鑄錯成大悔亦已晚哀茲若盧人茹

檠以爲飯

羣芳盡搖落秋風歸衰柳肅肅籬外風宛轉穿甕
牖隔屋狼狽人大言握我手羅敷自有夫使君自
有婦名節此尋常微軀各敬守

峩峩梨嶺松楚楚箬溪石松石致足佳十年閩海
客感恩謝故人念遠意不薄仰面窺遙情煌煌滿
京雒忽復櫻縷篝形影自相索叢棘百仞高鐘鼓
傳大宅頗悉故人心不隔咫尺含淚欲有言惻
惻畏秋迫

入座心俱動繁寃難共陳無家可內顧悒悒枉馳
神浮雲自舒卷汨沒喪吾真酒至聊一酌語意重

未伸含悽念君子棄置若微塵鞭影無良馬問渡
失要津咄咄復咄咄良時獨含辛

野性若麋鹿慚愧謠詠齊積讒亦有因叢垢豈無
階唾心捧兩掌肉顫無人悲學成謗書滿笑彼樂
羊妻奇疾集弱躬行藥自徘徊况復值重九易爲
風雨哀寒菊難再見今年開或稀故里不成返孤
鴈有高飛

服藥求長年辛苦採百草大藥亦已成頃筐委周
道泰山日峨峨黃流時浩浩我年不半百何計驟
能老

新月入葦蓬寒風透木壁薄裳涼峭峭薄衾明歷

歷裘破思禦寒預爲顛倒易奇溫欲乞人持書欲
何適當時援手者匪不振高翮誤落畢羅中溜澠
同一迹良馬負鹽車加之以衡軛鞭策無終期高
節竟何益

我家近南陽菊種滿層阿竹篠隱葯房間之以青
蘿桃李匪不艷感此與秋空策杖東籬下白雲滿
山陂苦節不可貞美爾爭一遲羣芳無射出挺然
冷作輝妙藥貴始英食之色不萎我不期大年採
之欲何爲

我屋因高樹入秋色不滋松柏有直蔭遐矚使人
思餘木葉競脫飄蕭去安之不材何足惜所惜在

歲時

鸞鵲牖外風盈盈機上女悵然有所思俛首看機杼
機中燦雲霞空承曉底雨迹象本難明隱約寸心許
感激知己心欲語不盡語

折車羽有術鑠金口有道濃霜志殞物何惜一寸
草風雨日相催誰能容我老歎息硜硜人退耕悔
不早緇素色不迷願君淡自考慈儉不爲先今乃
識爲寶

鴻鴈鳴高天蟋蟀卑相屬籬花漸已黃葉葉紛承
綠惟此患難人獨傷時序速寂寂不敢言黯黯燈
局促搖蕩世外心徒爲萬棘束斂心就繩墨美彼

東古堂集卷之二
五
璞中玉飲灰欲洗腸腸哀空曲曲疲馬臨溪池自
嘶前路促無復高處登篷前聊躑躅秋風天未來
悲哉此板屋

夏畦與牛醫得拜先人墓悲我亦人子委視在道
路依依尚夢歸望望空旦暮鬱鬱幽閉中昧昧難
成寤歎息此危躬不若薤上露乃知爲養者出處
能堅固寒蟄絮我床涼颼林外度掩涕擁敝衾細
數平生誤披誠說向人誰能諒我素

白門有敝廬思以庇兩親竭來棲宿莽誰成數尺
墳弱弟難當戶我子空荷薪炯炯地下眸望此赭
衣人養葬無一缺孝弟良有因

濁酒進一觴自謂已忘憂短籬跬步行共云得遠
遊履霜不自覺勿勿已成茲擿埴不知息空爲達
者嗤頗聞陶元亮松菊有前期

隔籬三數子互歌忽互悲冷泪互盈盈互拭短後
衣時命已不猶事機坐相違中有義心人強顏有
光輝却哀爲祥言否極福履綏金鷄自天下與爾
攜手歸買車不買舟早得達庭闈盲子不忘視病
鳥不忘飛長跪謝客言昂首共遙睎客去北風寒
瑟瑟掩柴扉

秋菊亦已花涼颼亦已慄悒悒幽室中徒見迷陽
列有悲自悄悄唾壺未敢缺念彼素心人躊躕一

東下集卷二
寸札棘路慰人難寧不惜離別微傳發長慨此聲
久不減璋珪雜甌窰或能爲我察

微霜入高林丹黃雜成綺寂寞得好顏枯樹有情
爾跼踖卧荒廬奇寒先襍被抑抑制心眠五更心
不解忽憶東籬花安能移著此

遙識我婦邁長歎攬素幃更憐我弟幼把菊自徘徊
徊日望廣柳來此是孤臣歸悲哉狼藉淚紛然欲
滴誰雨露不擇地且爲寄寒衣

客索壽母詩卽用客韻客京口人

寒霜朝滿屋枯雪夜滿庭肅肅紡聲中教兒戶自
扁苦竹有高節玉山多晚青明明天際月照此鶴

髮熒

白雲生遙望遙拜松菊庭旁人欽爾孝天心不盡
局殘書慰患難努力舊擅青文辭日燦爛金石日
晶熒

秋風江上來瑟瑟盈戶庭念子遠行役悽悽盼柴
局瓜步曉燴直金焦夕照青安能此日返老眼慰
雙熒

重九後一日偶成

霜嚴百卉凋况此蒲柳質良友憐我衰筵簞卜凶
吉龜策紛然陳靈氛言不一理外借遙證淡情施
曲筆神有所不通數有所難必塞翁馬不來何者

爲得失

重九後二日園次仲潛過慰用去字同冠五

賦

故人攜壺觴覲緬籬外觀入座無定心酒行真急
遽披誠亦草草一卮得百慮落日下空牆欲言客
已去

秋夜虎林寓園同胡元潤吳介茲王隆吉

賤貧輕別離容易同爲客肅肅逆旅中徒爲秋風
責鴻雁在高天寒蛩滿四壁蛩音無定情鴻心有
遠適

次施尚白韻與陳伯璣

孤雁凌秋風，叢花殊未發。誰謂故人來，相顧無華髮。
臨流揚輕帆，或恐中道絕。君意在瀟湘，胡乃滯吳越。
迷陽滿研足，襪被危途歇。寒香漸欲成，踟躕此明月。

介茲三十初度酌以紅露

春雪正盈途，淮南舟共借。去鄉日幾何，忽忽秋已迫。
雨氣滿雲門，寒風吹大澤。爾年方三十，黃鬚漸欲白。
嗟我一生艱，此行乃云謫。彼路亦何寬，我途空格格。
與爾坐土牀，層層布葦席。杞菊不成飽，茗粥數相易。
夙頗尚繁華，哀此地久瘠。妄欲與人靜，難云有大益。
雙耳不能飛，迫以檣逃籍。我固叢百

愆終當以此斥意氣數欲振所悲昔在厄貧賤亦
能甘所悲累吾客客意良自厚擎卮笑啞啞公昔
白雲司欲謀無善策雙淚日盈盈寒衣猶有迹卽
今寂寞酒或當勝疇昔富貴亦尋常景光當愛惜
借卮一酬公愁心相與釋

悼黃山孫子

黃山孫承露爲文若玉竿新詩頗優柔據琴興瀟
灑時時爲我彈泠泠秋水瀉意中偶淒動酸風盈
四野自矜調難傳指去意須捨忽復抱琴歸長眠
英山下傷哉後死人欲聞此聲者

青州

自我來青州忽復近三載遠謫素所安所悲顏色
改髮童齒盡豁瘦骨儼若嶮旨酒難更飲妙藥誰
容採但餘愧悔心壯志何常在嘆息復嘆息白日
不相待

高子康生偕予客青州以母喪歸予時在都
下不及追送

高子方遠遊慈幃痛已喪仰天自槌心血淚空蕩
漾朝行不及星徒跣奔江上我時滯國門念之悽
以愴同悲復同悲親沒不屬續嗟哉南陔詩孝子
相戒養

齒落

常聞神仙侶齒落復能生我齒落已盡生意了不
萌兩足復半跛雙目亦漸盲衰相日錯雜老淚不
縱橫難絕鶯花想徒爲霜雪驚三芝何地覓五藥
無計成有形終自毀有堅終自傾雖有烏獲力難
與造物爭

七言古

還硯歌

高士硯如美人鏡寒光易使新妝靚宛轉簪花花
亦憐蛾眉妒殺秋波淨髯公有硯真奇哉帝鴻玉
紐不須猜汾水囊中流不盡著面依肢盡綠苔類
月涵星五色亂欲紫不紫紅玉斲血光肅肅座客

欽誰能竟作澄泥看兩耳蜿蜒雙蟠龍正面寶瓶
綠芙蓉仙女飛來時拂拭閒綠淨盡生春紅常笑
澄泥類甌瓦絺綌盡聲終啞此泥携來當石彈
冷玉清金聲上下波濤雷電滑與光摩挲久之作
古香他硯濡墨附此肌磨之恐與肉相防髯公割
愛遠贈我惟我不言心曰可座客嗤予石三災羞
見青蓮生朶朶却思寶鏡去美人玉臺易使玉顏
嗔即使團團生別照如花失月不精神何似還君
君自寶情之所在莫草草攫人遂欲移人情我訝
世人輕所好美君寶研與鴻文揮手相贈見君心
曾經我眼卽我有我但欲與此君結爲隣

東坡先生集卷三
胡三元潤徵裘歌

前從逮者閩海回帆到揚州不肯開趙趙一日復
兩日欲待我客與俱來我客不來書亦絕搔首船
頭自嗚咽朝憑鷁尾引雙眸胡郎岸上足蹙躡自
言待公凡幾時君乃成行我何之吁吁不定風飄
疾招招舟子淚漉漉扶持登舟急遽拜拂拭我面
持我械天平人耶至遂此搖首無聲但睚眦是時
當空日大炎胡郎正著葛衣纖絺多孔不承淚
點點穿從肌上沾伏日幾時北風潑胡郎葛衣不
成脫一絲兩絲人不憐馬上肅霜馬下駢嗟夫我
欲學爲裘奇服欲從句裏裛屈身成直良不易近

地遠天何所謀胡郎詩成句盡好甌窶汗邪多所
禱徵書四出羽檄忙莫謂大寒索不早獾狼羊虎
羆豹麋紫鳳玄貂與青猊不信白狐偏有腋一寒
戀戀故人綈雉頭集翠出何門懸知此物定奇溫
人言君欲爲華耳其心不肯哀王孫飲章迫人身
被縈我有褐裘不自給六月披來賣與人十錢得
五人猶澁卽今只餘破羊皮割半與君兩不宐君
言爾在雪霜窖脫復徵多分相遺茫茫雪花大如
掌妄一男子東海上知君立意學神仙彷彿似者
王恭篲我客不來爾泥塗重裘者子誰丈夫開口
告人豈吾徒逝將去此登天都食藥金庭飯玉厨

雲綃霧縠紫霞繻荷衣蕙帶明月絢衆嫔弄簫童
和竽左舞青龍鳳右趨青陽膏潤色和愉大穢無
如禽獸郭慎母使近冰雪膚

羣鷗寒話圖歌

許生崛強好畫竹整整斜斜風肅肅向北忽不見
此君一心惟愛寫枯木南司夜夜北風多呼酒不
來可奈何硯凍杯乾不肯睡禿筆閒從冷炕呵呵
筆搖搖拂敗紙童童偃蹇無樹理燈下微窺龍虎
姿離離欲死不成死雨鞭風撻老蛟飢左攫已絕
右挈離心憐欲益好顏色粉墨兩看無所施淺者
屈霜淡屈雪白摧龍骨黑老鐵到底不能看作薪

此公雖苦有高節半夜俄聞烏亂啼棹棹軋軋明月低苑樹何曾集冷翼不知飛向誰家棲許生見鴉長太息萬巢突兀生胸臆鴉爾來前爾鴉前吾將巢子以奇墨我樹雖枯得大年南枝不脆北枝堅關河雪冷謀且息暢飛暢舞好更遷夜溪鴉與羣鴉語上下四旁同一處嘈嘈切切無留言我歌爾和慎莫拒朝從昭陽殿裏來千門萬戶一時開龔乎鼓之軒乎舞親見鄒衍吹律回鳩樂閒房鵲笑大來遣我酒羣相賀吾徒豈不憶寒號枯枝得坐且同坐楊柳藏身憶白門欲飛不飛戀黃昏此心流水孤村外此地難言好久存葦屋風飄不成

畫放筆與鴉爲酸話不知幅間與樹間更殘月黑
羣鴉拜許生畫竹竹盡情許生畫鴉鴉有聲但是
一點兩點墨何至遂與羣鴉爭許生慎莫悲寒昀
會使墨光有奇吐噦噦天上鳳皇鳴日寫梧桐千
萬樹

霜月乞酒歌

長安何來百酒民脫衣買醉未辭貧三旬九食曾
不顧牆外涎流麴米春南方粳稻北黍粟易州滑

辣青州玉

易酒以辣名青州有金玉露玉勝金

往誇陳家甘露居新

推劉氏攔掖局泠泠白雪與青霞南和荷葉內丘

瓜

南和刁氏以蓮露爲麴內丘喬氏以西瓜爲釀

錯認水傳羅侍御

德州羅公

欽瞻家釀近推第一錯認水僅其一種百花獨羨衛侯家故衛侯以露名酒至

百餘種大淡卮淺卮許介壽一年十萬八千覆白

言身入帝京來油囊薄薄雙眉皺一斟再酌難遽

酣半蕉耐此苦且甘蓮須頗憶曾家好閩會城惟

須釀酒卽賤亦數雙門藍閩會省雙門前藍氏以蓮公以

北酒頻誇我我適飲之無一可平時斟酌如淋灰

比來對之願空朶許生傭書茅作房夜淡喉乾十

指僵五經不來鬼欲哭古樽以經名枯身難就冰鐵牀

推戶打手發長慨月沉柏黑影瞢瞢急淚不垂霜

下衣風前冷盡無人態故園忽憶隔年釀閩酒以隔年陳

上為安得致之醉為龍帳裏欲持昭儀足成持不持

意憧憧惡睡急搖小僕劣羅家或應餘甜雪

長安諸酒

都以斜傾倒覆都將來倉卒入口不滿舌二王是

時杯在唇

若士壽格

羅公急人倒著巾更靜板門不敢

打一滴兩滴乞諸隣王子高義不昧昧大言此生

真憔悴破觚盡甄倒壺觴我醉不急急客醉目動

輔睨意全超許生揖酒雙足搖獨影大吞殊未已

驟看十指發紅條卮卮未歇羣寒挫酒民聞之失

笑大淋漓作畫又作書枯木斜添竹个个得醉不

寐意懜騰自言此飲得未曾素負知人遂失子名

下由來無妄稱猶是向者旨且苦一時不教與噲

伍乃知施人須當卮薄醴頓爲王郎醺

濃厚

明日酒

民報奇聞許生獨酌得大醺始識北酒有妙理我
公非故張其軍許生飲酒且從俗我譜北酒猶未
足天家秘醪不外傳桐乳淡紅蒲萄綠

豫章郭生移家劍津爲羅使君徒步由閩入
秦晉至長安朴誠亦足重去年姑蘇值其
四十初度頃將還里索予補一詩

載字攜家入閩粵心愛劍津龍一窟津口神物豫
章來一潭空碧雙崕岼日日持杯澆老龍客難夕
聞朝遂發越吳齊魯晉與秦萬里蹣跚意艷艷忽
然欲作故鄉人自言四十已白髮勸君隨地且淹
留去年曾醉蘇臺月

陳生於白雲司中乞得數椽晨夕依其老親
子哀其志爲賦二詩倣少陵後苦寒行

門外城中心交憊晨夕趨跼栢牆缺姓名時常變
向人顏色承親無定設老翁昨日酒飲喜儂因只
隔此一闌夜溪讀書燈未滅

冒難爲養陳家叔厠諭不忍假僮僕前門鼓響帶
日關親榻肯容子並宿凌晨泥雪衝奔軸數錢乞
屋心自傷咳嗽夜聞老人房

齒髮

黑髮旣白堅齒脫方引爲歡誰錯愕主人欲歸客
安托忽去忽住任落落我衰豈復得大年常恐虛

爾黑且堅及見爾輩先我老始知于我功用全髮
髮齒齒爾勿苦相將歌舞歸黃土

賴古堂集卷之二終

賴古堂集卷之三

浚水周亮工櫟園著

五言律

雪苑不寐

萬感來清夜蕭然秋已成
殘燈搖遠夢細雨數寒更
江國書難寄中原寇未平
多情南去鴈頻喚度孤城

圃田示張大占

酌酒獨唏噓十年愁未除
殘書淹市讀茅屋趁人居
久病親關慮長貧友媿疎
城東臺突兀吾意且騎驢

寄洧川師三戒公

不見師三久書來大驄山過橋聽水逸倚杖送春
閒新竹高何似故人去未還前朝雨甚好應醉灤
西灣

游新密雲巖宮同文大士姊丈

入谷石僂僂寒侵白罽衫幽亭秀木隱古寺晚山
緘野水閒爭壑孤雲靜結巖洞中幼渺甚應自有
仙函

同滕伯倫計立柚吹臺酌月

林壑秋冬際淡予一往情人同立素月園自薄時
名靜聽杯醪濁閒消客夢清平臺鐘漏遠恍惚下

寒更

飲宋雨菴先生湖上齋同吳讓伯延仲

城老荒陰逼欄疎野秀開雲過茅屋去水望板橋
來藥褱閒書帙香筠共酒盃遙看鶴放處笑謝爲
予回

侍家大人湖南夜泛

落日驅游客湖山夜乃姿波光延月晶鐘韻引舟
遲過寺畱僧夢撐煙破荻帷蒼茫看不定攜得幾
峰隨

哭四十六叔穆然

風雨秦淮別五年相見稀夜臺攜女伴荒塚望兒

依疾以吟安得魂因親老歸櫟林他日過詎忍拜
慈幃

叔遺腹未育
一女以痘傷

孫北海夫子爲亮買田

亂識爲農好新分負郭田依親已有歲得食願逢
年目送槿籬月情怡麥浪天平疇春雨足八口笑
相牽

涿鹿逢張林宗先生下第

天下方多事上書胡復歸文章誰較是吾道未全
非弟子壺空缺先生塵自揮西山朝氣爽澹欲上
征衣

同張林宗先生秋郊坐月

流火初驚序閒園報早秋林虛淡進鳥水靜淺浮
鷗時果牆頭摘遙山樹外求天風吹過處吾意亦
悠悠

寄庾大

爲語庾公子儂無昔日狂措身如坎宮到面識風
霜愁病違千里音書滯數行安危須將相勗矣趁
君強

同張林宗先生南陂秋泛

載酒南陂去霜林葉欲紅澹煙疎柳外小艇夕陽
中摘果閒村老捕魚閑野童亂雲吹盡處遠岫歛
相通

方密之張瑤星過飲予將發北海

同是江南客他鄉情倍關倉皇千里去辛苦一宵
閒羣盜依嵩勁王師涉漢艱如何客裏酒未是送
子還

哭敏求家兄

淚盡江南信英雄死布衣三喪猶未舉萬事竟全
非慧性年多促文心子半稀秦淮空有約惆悵擲
金徽

李無塵校書

落落全刪艷蕭蕭別是芬相將入白社猶道醉紅
裙人澹淡秋菊歌閒薄暮雲江南夜有夢此地却

逢君

高非援至自膠西便送其返敬亭

荒隅無節序八月試新茶海岸同爲客杯中各有
家秋風吹橘柚潮水冷魚鰕欲去何由共蕭蕭數
暮鴉

送馮伯宗北上次唐肯堂韻

遠夢勞千里秋風冷一檠爐煙飄夜月茗火煮殘
更驛路烽煙滿羈心去住驚新醪清可醉莫聽亂
蛩鳴

寒食同吳衆香盛玉郎句曲道上

客裏偏寒食羈愁冷共嗟斜陽明野水孤鴈振荒

沙未覺予何事反憎人去家疲驢不解意故踏亂
飛花

金梅郎讀書金焦沒之前夕苾芻夢君來爲
寺神肖貌祀之

不謂梵嚴子遽乘玄鶴飛魂搖殘月喚骨冷斷雲
圍古廟憑僧拜高文任世譏金山新有夢顏色尚
依稀

寄蘇武子都門

江南歸不易憶爾淚沾巾雨雪深窮巷風塵老故
人青衫依帝里白眼傲羣倫空負燕臺約梁園寂
寂春

哭馮九

病裏難爲別殷勤望我歸貧猶厯鬼慮死恐累慈
幃弱骨支荒塚孤魂澹夕暉少年無故友泉路欲
誰依

寄支長卿

何地覓雙魚空聞返舊廬風塵羈旅淚愁病故人
書世亂客遊賤烽連家報虛干戈吾已厭容易去
鄉閭

高密西園同何匡山飲

何許奏清音鳥呼客入林徑香生野秀城老送荒
陰羣盜縱橫甚吾徒感慨深草堂清可醉不奈更

東坡先生集卷三
孤吟

且飲水西湄百端交未披欲愁愁始我之思思云
誰池靜花閒落簾疎柳澹垂故鄉離亂甚卮酒易
成悲

蓬萊閣

萬派空明際憑高眎所之先生移我意此水過吾
師雲墮千帆亂波騰萬島疑神仙不可接浩渺使
人悲

人望盡沉沉蒼茫何許尋萬山恆欲頻一水互爲
侵汨沒空時序波濤自古今百端交集處冷淚滿
衣襟

程慎先爾止侍尊人遊粵

碧玉繞青蘿依親好共過帆回山盡見鷗起水仍
波秋迴邀歸甚檣危受雨多北來何所事滿眼足
干戈

雪中見無衣裨卒荷戈戰慄予乃服兼裳解
一與之感而成詩

遠戍寧如此披衣雪滿膺莫嫌斑是血但恐絮如
冰挾纈恩難繼嬰城力未勝相看雙墮淚斯意足
相矜

贈陳章侯

甲子歲予侍
在暨陽卽索交章侯
家大人

浣紗溪上過頗憶爾能文熱客紛相逐閒鷗冷自

羣伊人依白露妙畫攬紅裙清酒三升後聞予所未聞

新城不寐

古驛魚龍裏行人盡夜驚洪波摧斷岸狂颺起荒城不覺千行淚惟聞一派聲故鄉應有夢海月照衾明

新河

古渡迷殘雪蒼茫未易過逢潮無定岸入海少停波鄉思青燈黯羈愁白髮多不知緣底事擁絮淚滂沱

天狼

共指狼星皎天弧未肯張此身同洩渤吾道總糝
糠不自我先後誰爲別雨暘可憐時已晦正色尚
蒼蒼

東平

烽火經年逼傷心大小東城孤倚雉堞路仄隱蒿
蓬人影殘骸裏孤聲敗壁中芒鞋無定向未敢泣
途窮

汪子白同至泗上先予一日返石城

朦朧家作念未敢信爲人却喜君歸舍先時我慰
親隔江成往世作客遂三春畏路無朝夕關心淚
滿巾

東坡全集卷之三
重過冶城唐道士閣上

冶城曾結社不記是何年鶴老藥欄外竹添經閣
邊鐘聲猶肅肅春草又芊芊服食顏真好從公見
倥傯

江上畱別王子荆李遂臣盧長華張石平

逐客看山去荒城暮雨時維舟將進酒慰別遠如
期秋意蘆中滿寒風雁外吹嶺南卑濕地容易使
人悲

望方山敝廬在其下

我屋方山下學耕愧未能提壺閒聽鳥洗鉢偶隨
僧歲儉添僮嬾途窮取世憎到門無一客遠水與

心澄

燕子磯逢返上眉慧上人

夷門諸佛子一笠萬山邊不夢黃河水

黃流沒汴上人自水

出相逢江上煙萍蹤無異地霜髻有齊年

予上人與同甲

子笑指風濤惡孤帆月又懸

眉上人出林宗先生手書貝葉齋見貽燕磯

爲先生壯年遊憇地

猶有殘霞照應知世共奇

謝玄暉書如飛花滿日殘霞照人

空山

曾杖履冷月認鬚眉光自帷燈見珠從破衲遺平

臺一夕水隻字足人悲

靜海寺僧以塔碑見貽是初揭第一紙

舟聚水淙淙魚腥人語哢小亭憑目送孤磬得心

降僧過惟談海

卽星槎勝覽所載

門開卽見江立碑揭第

一贈我法華幢

過五木呈薛歲星先生時先生薙髮稱米和

尚

老鶴鳴溪夜林孤五木殘蓬蒿前太守塵土舊衣
冠蔓草鉏瓜瘦荒村索米難梅花堂下雪入望水
漫漫

先生前守吾梁郡中有古梅花堂今没于黃流矣

錢塘江示王古直

兵甲縱橫地三年此再經雲移千樹暮雨壓一舟
停海氣噴江折吳山攪越青天風吹不盡何處憶

湘靈

自光澤發邵武初登閩舟

閩舟從此始到眼已千巒灘急提心過峰危仰面
看樹多依水碧葉不逐秋丹獨苦烽煙逼殷憂未
可殫

樵川城中從米澹生借書送日

大地悲秦火兢兢數卷書看山不出戶引水過吾
廬顧影杯兼月呼兒經與鉏干戈正滿眼珍重老
鄉閭

海岳菴中客時違但古歡辟園奴橘柚開社主芝
蘭山月映茅屋江籬倚釣竿舊京同一夢掩袂自

辛酸

公舊官
白下

偶然看世澹遂厭客勞勞冠葉新分籜瓶花舊種
桃戲魚吹藻密放鶴夢雲高欵戶惟容我頻來踏
綠蒿

碧玉環中坐如公卽倜傥謀身驚短髻累世怯長
年細帙欣人借鶯花代客憐林邊桑柘好何地認
烽煙

亂後過米澹生遯園

黃葉垌邊路從公汗漫遊長橋浮遠水老屋閉深
秋燼歎松杉勁香懷橘柚柔惟欣雨過處亂竹尚
修修

落日明樵水相看溪上雲編籬空索莫種樹昔殷
勤折竹扶新長殘書檢未焚燧燔猶不息卮酒意
紛紛

草草寒亭下林泉不外求紀遊同夢寐書校尚仇
讐空厭妻孥累難從里社謀望中全枳棘莫更上
高樓

萬馬嘶昭武將軍夜控弦園亭燐火逼城郭羽書
連且酌林中酒同聽雨後泉遙看飛鳥過雲外意
翩翩

陸驤武至自清漳

陸子文如海書成不自驕從人間打馬

驤武新訂打馬圖行

世入市學吹簫

清漳詩名市簫集

醉爾終宵雨同聽八月

潮故鄉莫漫去前路易飄搖

哭陳磐生

何因草草出辛苦死微官老至饑驅易時危戶閉

難鬚眉秋月迥詞賦大江寒一面由來昧無端淚

不乾

公集名大江草堂

昨見羣公子文章盡大家詩能傳五葉筆已秀三

花共歎廉州遠猶傳道履嘉何來溪夜信容易死

天涯

磐生佐郡廉州城陷死

幼在秣陵日聞君賦遠游暇心開麗矚遠致越前

修龍樹心無累雞林句尚畱琵琶圖上客入夜泣

啾啾

公小像作抱月懷風狀

硯耕多秀業錦字重三吳好事傳嘉客攢眉咏老
儒物疎雙眼濶道廣衆心輸銀管新花燦誰還合
浦珠

公有嘉客傳老儒咏公雷廉稿弗傳

兄子國光

吾族凋零盡後來爾不羣厄淡同賦劍金重自搥
文亂識農桑好衰看子姪忻何年款段馬虛里醉
斜曛

寄高康生

垂髫同一硯作賦古秦淮句讓兒時勁謀從老大
乖關心徒黯淡到面盡風霾且學當年醉悠悠未

可偕

洪江別佟懷東

江聲鏜鏜處此水卽吾師進酒求淡醉將離或不
知萬山何地去日暮重人思瘴癘殊堪畏春帆莫
更遲

期以明春
晤於秣陵

今日真成別泥人記此程場沙閒映雪岸鳥冷飛
更初客孤帆惑危灘一棹明誰憐鼓吹地渾不是
歌聲

林異卿

茅屋閒相向過從麴米春論交新悟老學儉始知
貧藜藿尋淡巷鬚眉認大賓

時異卿再
與賓筵

危途容易

別何地更爲隣

林得山

常醉林居士陶然遇古歡
畱僧忘日永閉戶識霜寒
家盡羣言悔詩成逐字安
孤舟回望爾歲晚退耕難

得山堂名退耕

別許有介卽用其韻

輒作數時惡懷人未別先
客心支夜永江影就燈全
鴻去看無跡魚烹望有箋
獨憐吳越水不透鼓山前

別正秋冬際羈心入夜真
淡更沙際櫂卮酒遠遊人
煙逼山容暮燈搖水氣新
後時應有夢風雨出

江濱

鄭胎聖楊凌颺朱璧符張龍玉自樵川尾予

舟至柘浦別

竟歲嬰城地凭高看遠潮予因守樵川凡一周星萬山詩力

穩予為樵川諸士一櫂客魂搖樓蝨猶餘話詩話樓在

樵川城上川流不盡樵問余前宿處尚剩幾甘蕉余在

於樵署種蕉數百本

客自秣陵至便與俱歸

君來殊有意只似促余歸小艇同花坐空山看鳥
飛經灘閒注水過嶺勸添衣不若秦淮好相期守
釣磯

庚辰春侍張林宗先生北上宿鄴下南寺越
十年已丑與公子子顧再宿其地見先生
壁上詩泫然泣下用原韻得詩四首

鄴下南頭寺同來聽妙香隨鐘攜竹杖分佛臥藤
床破壁孤兒淚長河一夜霜鴻文與祕笈蛟室可

能藏

先生遺集盡沒水中予所鐫百一耳

從公爲侍者早晚學焚香月下窺雙袖雲來宿半
床逢人疑鬼夢向佛泣風霜亦解淡山好云胡不
可藏

旃檀何地是再值逆風香萍跡茫無著雨聲盡到
床支筇雙屐月托鉢滿懷霜慚愧當年事浮名不

可藏

明珠十萬斛撒向濁河香奇字仍殘壁高吟在笛
床亂中無伏臘定後習風霜鐵網難收處蛟龍解
祕藏

小亭再用前韻

小亭曾顧曲十載憶寒香落豆輕翻譜移絃近就
床輕容飛豔雪薄幕貯甜霜略記填詞罷睨人祕
自藏

同蘭江趙丙三往返北道歸渡滹沱

三載蠻煙客蘭陰曾再過逢人同北道下馬認黃
河長劍懸衣窄荒沙染髻皤如何來去路只倩小

奚歌

丙三童子
能吳歌

顧客難爲夜聯床話未闌里鐘懸樹老

北道做古
里鼓意懸

鐘大樹上
遇警擊之

站馬嚙沙寒看鏡衰顏恕擎卮旅思瞞

庖風兼駛雨不敢勸加餐

黑霧滿滹沱寒風吹客過羈人依凍柳瘠馬怯洪
波夢昔悲三輔還家昧兩河蘭江春事好與爾老
漁蓑

萬里閒來去前期未易論遐心儀劍道素節托雲
根與客同呼馬教僮學佩韃蘭陰酒正熟許我數
朝昏

江上畱別高康生蔚生

曾期閩嶠去親老互躊躇倦笑書常蠹饑憐畝未
畚晨昏蔬笋饌兄弟薜蘿居辛苦長江櫂三年再
送予

康生期入閩薜生期入越皆不果兩君所居多薜蘿康生命予書薜樓頽之

馮伯宗

爾昔移酸棗烽煙爲我哀飢尋高隴麥倦覆故園
杯奉母疑南北還家任草萊借舟宿所約得聚莫
言回

舍弟靖公

應觸庭幃意相看未敢悲猶言前路坦忍顧老親
衰歸計農桑朴泥塗出處危乙鴻看不定莫悵寄
書遲

章侯聞予將返湖上預成一詩次韻答之
地入蠻鄉去誰畱湖上居相期強善飯悔不早焚
書送別潮聲闊懷人鴈影疎贈予山怪甚帝見亦
嚄噓

甫發錢塘一僕失足溺水悼之

風波吾已慣老僕幾人存倦葉迷秋樹岐途昧濕
魂重來予蹇拙獨累爾煩冤不謂梁園水奔騰尚
可援

僕從大梁
水中逸出

哭車亦仁亦仁相隨北海數年比欲從予入
閩取道返里遂沒於家三年哽咽今始成
聲

風雨燕齊路鶯花吳越舟
乘桴萬里客織薄半生
遊處士憂方劇文章氣未休
雲林三十六一一使人愁

北海同爲客齋門盡日關
家貧期永歲世亂重生
還結屋依溪柳攜書住萬山
十年荊棘路處處憶君閒

江岸拾得野花歸插膽瓶中次元潤

夕氣遙岑上明霞未易量
巖花方一摘山句滿奚
囊麗矚凝高夢秋心昵曉粧
可憐時已暮誰與問三湘

舟中蟋蟀

清絕是何音遙遙損客心情來生古驛夢欲破荒
岑不識風波惡蕭然雨雪淡孤帆無地泊冷淚滿
衣襟

舟中載馬

輕颿載駛駛夾岸草萋萋浮鷺心相接飢鯨夢與
齊江空閒雪練波冷襯霜蹄半夜潮聲過歡同萬
馬嘶

隔舟一客顏頗岸异穆然蘭蕙中靜坐鈔書
鬚眉雪靜弓刀琴瑟肅肅望而异之走詢
則杜日章也予覓日章於維揚三載矣茲
乃得之喜賦一律

東坡先生集卷三
扣枻孤吟客縱橫未可京輕舸蘭韻老小雨劍歌
清圩頂分鷗白方瞳照鶴明暗中能摸索不爲舊
聞聲

阻漲

江舟維古驛一月兩黃梅廬屋難聽溜底田亦厭
雷徒看歸路迅如見遠山洄便欲乘流返吾廬數
舉杯

陳階六在雲間索同社諸子作畫數十幅見
寄感賦一詩

能事難相促維舟大索心伊人盈一水好句滿千
林早夢詩同寄傳聞意已歆瘴鄉風雨惡誰與應

苔岑

寇退寄詢文大士

城郭半兵殘
山居想更難
殷憂荷聖主
戡定恥儒冠
萬骨羣霜白
千家一火丹
傳聞罪已詔
又已出長安

卽席次韻贈信州周公鼎

兵戈十載後
窮巷遠遊人
隔嶺悲親老
囊書索米頻
江看亂裏闊
語到故鄉真
金石蕭然發
寒雲不肯貧

次韻贈同里馬遇伯

如君應將相
十載老爲郎
嶺塞排雲逼
天空倚劍

長荆榛江國淚蘭芷夢魂香莫畏風濤惡蕭然一
葦航

亂裏談經處春風絳帳融大言卑小賦努力挽長
弓盜賊殊方滿煙波故里空無端飛動意指顧許
誰同

再次星子韻贈遇伯

同輩君年少微官幸早休一帆吹彩鷁萬馬響蒼
虬匿影無南北還家昧去畱相依城郭滿只此是
殊猷

黃田守夜

坳寇真難撲羈心盡夜忡樓高欹古驛岸斷壓孤

蓬鬼氣低翻火梟聲亂舞櫻朦朧沙磧裏處處響
弓刀

重九日茶洋驛有懷舍弟靖公

此日同寒食良時變欲寤高臺難北望客意憚秋
風別路烽煙滿鄉書鴈羽空插萸看幼弟天末雨
濛濛

咏燕子巖

巖形酷似巖下灘間萬石羣飛俱有輕盈
受風之致雖狹遜燕子磯然致足相抗

瀨上呢喃處差池觸小舠臨風難避戍掠水獨趨
丁藻映玄衣亂雲流玉剪停鷗鳬狎已慣相與唼

浮萍

汀水自南下
故以丁名

賴古堂集卷之三終